

Un dia farandulero na Aruba 75 aña pasa

Carlos Gardel a trece musica popular Aruba



Awendia debi na nos industria di turismo nos por aprecia aki hopi show di artistan internacional cu na hopi parti di mundo o ciudad cu hopi mas habitante cu Aruba shownan asina no ta yega. Tin hiaha nos ta puntra nos mes si e fenomeo aki ta semper ta asina o ta algo di ultimo decadanan?

Un hecho farandulero cu sigur a marca historia y a keda graba den memoria di hopi di nos grandinan ta e bishita di e astro di Tango Argentino

Carlos Cardel, riba dia 28 di mei 1935. Tambe algo cu Carlos Gardel a haci pa promer biaha den su bida na Aruba 75 aña pasa a cambia rumbo di su bida di un manera dramático, y kizas di e musica di Tango pa semper.

E temponan aya Aruba tabata scucha radio di Venezuela (desde 1926 tin radio, Radio Caracas), di Corsow, Cuba y Santo Domingo. Mester apunta cu e tempo ey ainda

tecnologia di “transistor” no a wordo inventa y e radionan tabata traha cu “tupe” cu mester keita promer cu e radio por traha. Propaganda of otro noticia importante tawata wordo haci door di core cu auto cu speaker (bosina) aribanan den pueblo pa anuncia un ke otro.


Carlos Gardel yega Aruba procedente di Maracaibo cu barco dia 28 di mei 1935 y a haci un recorrido den cayanan di Oranjestad. Un multitud bastande grandi di hende

a bai pa salude. Tambe e a hospeda na un Hotel situa na Wilhelminastraat # 67 cu ta yama “Hotel Palacio”. E hotel tabata pertenece na sr. Boy Debrot. sr. Debrot tabata un comerciante grandi e tempo ey. Hotel palacio ta keda dilanti di caminda awendia tin e famoso restaurant Argentino “El Gaucho”. Pa bai sigui su gira na Corsow, Carlos Gardel a disidi di tuma un avion, esaki a haci cu Carlos Gardel pa promer biaha den su bida a viaha cu avion ariba e ruta Aruba- Curacao. Carlos a bai den e Fokker tri-moter “Snip” cu algun luna anterior a habri e ruta aki pa KLM. E motibo cu Carlos no a bula nunca den avion ta pasobra e tabatin hopi miedo di avion por bisa te hasta panico di bula cu avion. Lamentable su panico tabata su proteccion.

GARDELATRECEMUSICA POPULAR ARUBA

Cu Gardel musica popular a drenta Aruba, ya cu anteriormente Aruba su musica tabata wordo domina pa musica folclore clasico manera waltz, mazurca, polca cu a wordo treci dordie promer

habitantenan di continente bieuw y despues a sigui nace tumba y tamboe di influencia Afro-Indio Caribense. Tango tawata un musica y baile hopi mas sensual cu Aruba tawata conoce pero e la bira un sensacion. Hopi hende na Aruba a cuminsa canta tango y tambe cana cu e sempre “a medio lado” (di un banda) manera Gardel tambe, te hasta sombre a caba den tur tienda na Aruba e tempo ey. Agrupacionan di joven lanta uno hopi popular tawata “Los Trovadores Tropicales” cu integrante manera (si mi ta informa bon) Clemente Lacle, Shon Fi Booi, Sjemí Coronel Jan Croes (di SN) y Harold Hopman. Tambe sr. Tali Lopez tambe tawata canta Tango mescos Gardel. Gardel a duna su presentacion den Teatro “Gloria” cu tabata situa den Steenweg. tambe un bar a haya number di “TangoBar” e tabata situa unda awor ta Masifral. Tango a keda popular te fin di añanan ‘40 na Aruba. Despues musica ranchera a bira popular. Di Corsow, Gardel a bai cu barco Barraquilla pa sigui cu su gira den Colombia, despues el a bai Bogota cu avion y de



eynan pa sigui su via e avion bai di transito Medellin, saliendo di Medellin dia 24 di Juni 1935 e avion “Ford F-31 tri-moter” slip bai dal den un otro avion ariba e pista di aterizahe.

Gardel a muri carboniza hunto cu un gran parti di su acompañantenan y e leyenda di Tango a nace. Tambe mi ta gradici sr. Frans Croes (92) cu a dunami algun informacion como un persona cu tabata presente na e show di Gardel 75 aña pasa como hoben di 17 aña. Si mi por a lubida of bruha algun hende of hecho mi disculpa. Importante ta pa nos historia no bai perdi !

Articulo skirbi pa: Ramsay Acosta